

# RI CUKUBABEL C'U'X RIQ'UIN RI JESUCRISTO

Ri cukubabel c'u'x riq'uin ri Ajaf, jari' ri nabey tijonic richin ri utzilej rutzijol. Ri cukubabel c'u'x yalan nic'atzin chire ri kacolotajic. Ri utzilej rutata'al ri tinamit rubini'an Benjamin quere' xubij: "Ri colotajic man xtipe ta chire, xaxe c'a vi nitzolin pe ruc'u'x y nucukuba' ruc'u'x riq'uin ri Ajaf Jesu-cristo" (Mosia 3:12).

Tabixaj ri bix rubini'an "Vetaman chi Q'ues Nucolonel" y chuka' ri bix "Chicaj Q'ues ri Nata'."

Tasiq'uij c'a ruvech ri rucaj Ruxe' ri Nimanic.


## ¿ACHIQUE CAMI RI CUKUBABEL C'U'X

Ri c'ukubabel c'u'x nel chi tzij chi nikanimaj ri achique kitzij pero man yojtiquir ta nikatz'et (tatz'eta' c'a ri Hebreos 11:1 y ri Alma 32:21). Ri profeta José Smith xubij chi ja ri cukubabel c'u'x ri nito'o kichin k'ij k'ij. Rija' xubij chi ri cukubabel c'u'x jari' ri rutiquiribel ri kuchuk'a', y ri nisilon kichin.

¿La nikatijoj cami ki' roj vi man nikanimaj ta chi xtibekila' etamabel y utzilej nojibel? ¿La yojsamej cami k'ij k'ij vi man nikoyobej ta chi c'o ri achique xtikach'ec? ¿La niticon cami jun achin vi man nroyobej ta chi c'o ri nuc'ol? Ri kavay, ri katziak, y ri kachoch e c'o kiq'uin roma c'o kacukubabel c'u'x. Ronojel k'ij c'o ri nikaben roma nikoyobej chi c'o ri xtikac'ul. Roj nikaben ronojel, stape' man yojtiquir ta nikatz'et ri achique xtikac'ul. Jari' ri cukubabel c'u'x (tatz'eta' c'a ri Hebreos 11:3).

Ri lok'olej tak tz'ibanic niqic'ut chikavech ri achique xc'ulvachitej ojer can tok ri vinaki' xquicukuba' quic'u'x.

Ri Noé xucukuba' ruc'u'x riq'uin ri Ajaf y xuben ri jun nimalej jucu' y romari' xerucol can ri ru familia chuvech ri



nimalej job (tatz'eta' c'a ri Hebreos 11:7). Ri Moisés xuch'er el ri ya' richin ri Nimalej Quiek Ya' (tatz'eta' c'a ri Hebreos 11:29). Ri Elías ri profeta xroyoj pe k'ak' chila' chicaj (tatz'eta' c'a ri 1 Reyes 18:17-40). Ri Nefi xuben chi xc'oje' jun vayijal chuvach'ulef (tatz'eta' ri Elaman 11:9-17). Ri ruchuk'a' ri nimalej ya' nitane' chuka' roma ri cukubabel c'u'x. Chuka' yeban jebel tak tz'etonic. Y chuka' niya'ox pe ri nic'utux chire ri Dios. Ronojel re' nic'ulvachitej roma c'o ri cukubabel c'u'x.

Vi nikatijoj ki' chique ri lok'olej tz'ibanic, xtiketamaj chi ri cukubabel c'u'x, jari' jun nimalej nimaxic pa ruvi' ri kitzij. Ri nimaxic ri' yojruto' pa kánima richin nikaben ri utz. C'a c'ari', nikac'utuj ka chike quere': ¿Achojiq'u'in cami xtikacukuba' vi kac'u'x?


Tac'utuj chique ri vinek chi tiquich'obo' rij ri niquben k'ij k'ij. ¿La yaruto' ri cukubabel c'u'x richin nabén ri utz?

### **¿ACHIQUE ROMA NIC'ATZIN CHI NIKACUKUBA' KAC'U'X RIQ'UIN RI JESUCRISTO**

Nic'atzin chi nikacukuba' kac'u'x xaxe riq'u'in ri Jesucristo. Ri apóstol Pablo xubij quere': "Manjun chic bi'aj chuxe' ri caj, ya'on ta chique ri achi'a', ri achojroma utz ta yojcolotej" (Ri Xquibanala' ri Apostoli' 4:10-12). Ri Jacob xubij chi ri vinaki' nic'atzin chi "tz'aket quicukubabel c'u'x riq'u'in ri Lok'olaxel richin ri Israel [Jesucristo]. Vi man ta queri', manek ta yetiquir yecolotej pa ri rajavaren ri Dios" (2 Nefi 9:23). Vi nitzolin pe ri kac'u'x chupan ri kamac y nikacukuba' kac'u'x riq'u'in ri Jesucristo, ri rutojbalil mac ri xuben rija' nisamej pa kavi' roj chupan ri kac'aslen. Vi nikacukuba' kac'u'x riq'u'in ri Jesucristo, nikac'ul pe kuchuk'a' pa ruvi' ri itzel tak yuk'bel (tatz'eta' c'a ri Alma 37:33).

Manek modo richin nikacukuba' kac'u'x riq'u'in ri Jesucristo vi man nikacukuba' ta kac'u'x riq'u'in ri Tata'ixel chuka'. Vi nikacukuba' kac'u'x quiq'u'in rije', c'o chi nikacukuba' kac'u'x riq'u'in ri Uxlabixel chuka'. Ri Uxlabixel takon pe kiq'u'in richin yojrutijoj y yojrubochi'ij.

Tasiq'uij c'a ruvech ri Xquibanala' ri Apostoli' 4:10-12 y chuka' ri Alma 37:33. ¿Achique roma nic'atzin chi nikacukuba' kac'u'x riq'u'in ri Jesucristo?



## ¿ACHIQUE MODO NINIMER RI KACUKUBABEL C'U'X RIQ'UIN RI JESUCRISTO?

Ketaman chi yojturusex vi nikacukuba' kac'u'x riq'uin ri Jesucristo. Romari' nic'atzin chi nikanimirisaj ri kacukubabel c'u'x riq'uin rija'. Quere' c'a xubij ri Ajaf: "Vi ta c'o icukubabel c'u'x achi'el jun runak' mestáncia, . . .ronojel xtiban tiquirel chive" (Mateo 17:20). Ri runak' mestáncia jari' xa ch'uti'n oc. Pero tok niq'uiy, nuben jun che' janíla nim.

¿Achique modo ninimer ri kacukubabel c'u'x? ¿Achique modo niketamaj nikaben ronojel ri nic'atzin chike? ¿Achique cami modo niketamaj utz ri kasamaj? Y ¿achique modo niketamaj yojch'o utz pa molojri'il o niketamaj nikasiloj ri piano? Nikatijoj ki' chire y nikatij kak'ij richin nikaben. Tok yalan nikatij kak'ij, jari' tok más utz nikaben ronojel. Quere' chuka' nuben ri kacukubabel c'u'x. Vi roj nikajo' chi ninimer ri kacukubabel c'u'x riq'uin ri Jesucristo, nic'atzin chi nikatij kak'ij chuka'. Ri profeta Alma xubij chi tok nikacukuba' kac'u'x riq'uin ri Jesucristo, jari' junan riq'uin jun ija'tz ri nikatic. Quere' c'a xubij rija':

"Man riq'uin vi ri', kitzij chi ruc'amon chi nic'asoj y nisiloj ri inojibal richin nitojtobej ri nuch'abel, y nicukuba' juba' ic'u'x riq'uin. Vi can xaxe vi yixtiquir nirayij ninimaj, tiya' c'a k'ij chi ri rayibel ri' nisamej iviq'uin, c'a tok ninimaj chi yixtiquir niya' jun c'ojlibel iviq'uin chire ri nuch'abel.

"Vacami, xtikajunamaj c'a ri ch'abel riq'uin jun ija'tz. Vi niya' c'a jun c'ojlibel richin chi jun ija'tz nitic pa ivánima, can kitzij vi, vi jari' jun kitzij ija'tz o jun utzilej ija'tz, jari' tok xtuchop sipojinen pa ic'u'x. Quere' c'a chuka' xtuben vi man xtitorij ta el roma man ninimaj ta, y man xtixutuj ta chuka' el ri Uxlabel richin ri Ajaf. Jac'a tok nina' chi nisipoj chupan ri ic'u'x, rix xtibij pa ivánima quere': Can c'o vi chi utz re ija'tz re', o re ch'abel re' can utz vi, roma nunimirisaj ri vánima. Chuka' nusakirisaj ri vetamanic y janíla utz ninna'.

"C'a c'ari', ¿la man ta xtunimirisaj ri' ri icukubabel c'u'x?" (Alma 32:27-29)

Queri' c'a roj yojtiquir nikaben chi niq'uiy ri kacukubabel c'u'x riq'uin ri Cristo. Vi c'o jun karayibal richin nikanimaj,

c'ari' c'o chi nikatij kak'ij riq'uin ri karayibal ri', c'a tok niq'uiy más ri kacukubabel c'u'x.

Ninimer ri kacukubabel c'u'x chuka' vi yojch'o riq'uin ri Dios pa ruvi' ri karayibal y ri achique nic'atzin chike (ta-tz'eta' c'a ri Alma 34:17-25). Man riq'uin vi ri', nic'atzin chi man xaxe ta nikac'utuj utzil chire. Ri lok'olej tak tz'ibanic niqitzijoj chike chi "ri cukubabel c'u'x ruyon xa caminek vi manek ta samaj ri rachibilan" (Santiago 2:17). Jun tzijonnic pa ruvi' jun achin ri xutun ri rucukubabel c'u'x riq'uin ri rusamaj jare':

C'o jun achin xrajo' xutijoj ri' chire ri lok'olej tak tz'ibanic. Pero rija' man retaman ta xutz'et ruvech ri vuj. Xuc'utuj chire ri Tata'ixel chi tuto' na chiretamaxic ruvech ri vuj. C'arunaj xapon jun tijonel chupan ri rutinamit rija'. Xuc'utuj chire ri tijonel ri' chi tuto' na c'a. C'ari' xretamaj xutz'et ri tak retal richin ri ch'abel. Xutijoj ri' chire y xretamaj xerutunuba' ri tak retal richin xusiq'uij chijun ri tzij. Juba' chic ta xretamaj xusiq'uij ri tzij ri man e c'ayef ta. C'ari' xutij más ruk'ij y xretamaj más. Rija' xumatioxij chire ri Ajaf roma xutek pe jun tijonel pa rutinamit y chuka' roma ri Ajaf xuto' chiretamaxic ruvech ri vuj. Ri rucukubabel c'u'x ri achin ri' yalan xnimer. Vacami ch'uch'uj ruc'u'x y nim ri retamabal. Vacami rija' jun uc'uey bey chupan ri K'ataj.

Ri Spencer W. Kimball quere' nubij: "Nic'atzin chi ri samaj rachibilan ri cukubabel c'u'x. Janíla ta nacanic vi roj nika-c'utuj chire ri Ajaf chi tusipaj etamabel chike. Man riq'uin vi ri', janíla utz vi nikac'utuj chire ri Ajaf chi kojrufo' na richin queri' utz xkojnojin y xtikatijoj ki' y xtkil ketamabal y chi man ta nikamestaj ri ketaman chic."

Vi c'o kacukubabel c'u'x, c'o chi nikaben ronojel ri yojti-quir nikaben richin nik'ajer ri achique kac'utun y koyoben. Ri Presidente Kimball xubij quere': "Nikatic ri ija'tz riq'uin ri kacukubabel c'u'x, juba' chic ta nikatz'et jun jebelilej samaj ri nivachin pe. Binakel man nik'ax ta chiquivech ri vinaki' y xa niqitzolij ri rubanic re na'oj re'." Rija' chuka' nubij chi e q'uiy chike roj nikarayij utzilej karuxnakil y nim kuchuk'a'. Pero man utz ta nikachajij ri kach'acul. Nikajo' ta yojbeyomer y xa man nikatoj ta ri lajujitakil. Nikarayij yojjel apon riq'uin ri Ajaf pero man yojmevayin ta y man

yojch'o ta riq'uin rija'. Nikarayij chi nika' pe ri job y nikarayij chi c'o uxlanibel c'u'x chuvach'ulef y xa man nikatakej ta ri uxlanibel k'ij y man yekatakej ta ri ch'aka' chic rupixa' ri Ajaf.

Richin ninimer ri kacukubabel c'u'x, janila nic'atzin chi nikac'axaj y nikatijoj ki' chire ri ruch'abel ri Ajaf. C'o modo nikac'axaj ri ruch'abel ri Ajaf chupan ri molojri'il e richin ri K'ataj. C'o c'a modo nikatijoj ki' chire ri lok'olej tak tz'ibanic. Chupan ri DyC 88:118 quere' nubij: Vave' c'a, man checonojel ta c'o quicukubabel c'u'x. Romari', ticanoj c'a chi utzil y titijoj c'a ivi' chivech rix chire ri ch'abel ri e richin etamabel. Ticanoj c'a ri ch'abel richin etamabel chupan ri más utzilej tak vuj. Ticanoj c'a etamanic riq'uin ri itijoxic y ri icukubabel c'u'x.

Tasiq'uij c'a ruvech ri Santiago 2:17.

¿Achi que roma xubij ri Presidente Kimball chi nic'atzin chi nikaben ronojel jampe' ri yojtquir?

Catzijon c'a juba' pa ruvi' achi que modo ninimer ri kacukubabel c'u'x. (kojmevayin, kojch'o riq'uin ri Dios, tikanic'oj rupan ri lok'olej tz'ibanic, quekatakej ri pixa'). Tabij c'a chique ri vinek chi utz niquben ronojel re'.

## ¿ACHI QUE MODO YOJTURUSEX PE TOK NIKACUKUBA' KAC'U'X?

Roma ri cukubabel c'u'x yebanatej nimalej tak samaj. Ri angeli' niqic'ut qui' chiquivech ri vinaki'. Yeyatej pe ri sipanic ri e richin ri Uxlabixel. Niyatej pe ri achi que nic'utux chupan ri lok'olej kach'oven riq'uin ri Dios. Y queri' tok ri vinaki' ye'oc e ralc'ual ri Dios (tatz'eta' c'a ri Moroni 7:25-26 y 36-37). Quere' xubij ri Profeta José Smith:

"Tok c'o ri cukubabel c'u'x, yeruq'uen pe ri apostoli', profeta'i', Nima'k tak Tata'al, yuk'unela', tijonela', sipanic, utzilej nojibel, etamabel, nimalej tak banobel, quic'achojirisa-xic ri yava'i', ch'abel, ruk'axaxic ch'abel, y ch'aka' chic. Ronojel re' yepe tok c'o ri cukubabel c'u'x chuvech re ruvach'ulef y tok manek ri cukubabel c'u'x chuvech re ruvach'ulef, xa manek chuka' ronojel re'. Ronojel re' yepe roma c'o ri cukubabel c'u'x, . . . Y ri cukubayon ruc'u'x xtuc'ul pe ronojel ri retamabal y ri utzilej runojibal ri nic'atzin chire. Y jari' xa roma ri rucukubabel c'u'x rija'. Ja c'ari' xtuc'ulumaj, c'a tok xtretamaj na ruvech ri Dios, y chuka' ri Ajaf Jesucristo ri rutakon pe. Y vi retaman quivech rije', can c'o vi c'a ruc'aslen richin jumul. Amen."

Tatzijoj c'a achi que modo xnimer ruchuk'a' jun vinek tok xucukuba' ruc'u'x.

## CH'AKA' CHIC MOCAJ RI UTZ YE'ANIC'OJ

Hebreos 11 y ri Alma 32 (nik'alajirisex ri rubaniquil ri cukubabel c'u'x)

Exodo 14:19-22 (nich'aratej el ri ya' ri c'o chupan ri Nimalej Quiek Ya')

Génesis 6-8 (ri Noé y ri nimalej job)

1 Reyes 18:17-39 (Elías ri profeta—ri k'ak' xpe chicaj)

Mateo 8:5-33 (yec'achojirisex ri yava'i', nisile' ri nima cak'ik', nimalej tak banobel)

Marcos 5:25-34 (nic'achojirisex roma ri cukubabel c'u'x)

# RI TZOLIBEL C'U'X

C'a pa rutiquiribel pe re ruvach'ulef, c'atzivinek pe ri tzolibel c'u'x. Ri Adán nic'atzin chi xtzolin pe ruc'u'x y vacami nic'atzin chike roj chuka' chi nitzolin pe kac'u'x. Pa rutiquiribel re ruvach'ulef ri Ajaf quere' xubij chire ri Adán: Que'atijoj c'a ri avalc'ual richin chi conojel ri vinaki' ri e c'o chuvech chijun re ruvach'ulef c'o chi nitzolin pe quic'u'x, roma manjun chic rubeyal richin xtiquichinaj ri rajavaren ri Dios. Roma manjun tz'il nitiquir nic'oje' chiri'. Manjun tz'il nitiquir nic'oje' chuvech ri Dios (Moisés 6:57).

## **ROJ KONOJEL NIC'ATZIN CHIKE CHI NITZOLIN PE KAC'U'X CHUPAN RI KAMAC**

Oj petenek chuvach'ulef richin queri' yojnimer y nijote' ri kac'aslen. Re jotobenic re' niyaloj chijun ri kac'aslen. Chupan re kac'aslen chuvach'ulef, konojel yojmacun. Romari' nic'atzin chike konojel chi nitzolin pe kac'u'x chupan ri kamac. C'o bey yojmacun roma man ketaman ta achique ri utz nikaben. C'o bey chuka' yojmacun roma manek kuchuk'a' richin yojch'acon pa ruvi' ri mac. Y c'o bey chuka' yojmacun roma xa can nikarayij vi nikak'ej ri pixa'. Pero roj konojel oj aj maqui'. Ri Biblia quere' nubij: "Manek jun choj vinek chuvach'ulef ri nuben xaxe ri utz y man nima-cun ta" (Eclesiastés 7:20). Chuka' nubij quere': "Vi nikabij chi xa manek kamac, nikatz'uc tzij ri kitzij man c'o ta ki-q'uin" (1 Juan 1:8).

¿Achique cami jun mac? Ri Apóstol Santiago quere' xubij: "Ri mac c'o riq'uin ri retaman nuben ri utz y man nuben ta" (Santiago 4:17). Jun chic apóstol xubij chi ri mac jari' ronojel achique ri man choj ta (tatz'eta' c'a ri 1 Juan 5:17).

Roma c'ari' ri Ajaf rubin can chi nic'atzin chi conojel ri vinaki' nitzolin pe quic'u'x chupan ri quimac (tatz'eta' c'a ri Moisés 6:57). Can conojel vi ri vinek ri e petenek chuva-ch'ulef c'o quimac. Xaxe ri Jesucristo can choj vi y manek rumac. Ri Chicajel Katata' janíla yojrajo'. Romari' tok rija' ruya'on k'ij chike richin nitzolin pe kac'u'x, richin queri' yojch'acon chirij ri kamac.

¿Achique roma c'atzinel chi ri vinaki' nitzolin pe quic'u'x chupan ri quimac?

### ¿ACHIQUE CAMI RI TZOLIBEL C'U'X?

Ri tzolibel c'u'x jari' ri rubeyal ri ya'on chike richin xkojos-k'opix el chupan ri kamac y xkojcu y. Ri mac nuben chi man utz ta nijote' ri kac'aslen. C'o bey ri kamac nuk'et ri rujotolen ri kac'aslen. Roma ri tzolibel c'u'x, c'o modo chi nijote' chic ri kac'aslen jun chic mul. Nic'atzin chi nikana' k'axo'n pa kánima coma ri kamac. Nic'atzin c'a chi nika-k'et ki' che macunen y nikachop quitakexic ri pixa'.

C'o modo richin nitz'olin pe kac'u'x roma ri rutojbalil mac ri xuben ri Jesucristo. Ri Jesucristo xerutoj ri kamac. Jari' ri man can ta nik'ax chikavech. Ri Presidente Joseph Fielding Smith xch'o chirij ri rutojbalil mac ri xuben ri Ajaf y quere' xubij:


“Yin nutijon k'axo'n. Y chuka' rat atijon k'axo'n. Y c'o bey janíla c'ayef ri k'axo'n katijon. Man riq'uin vi ri', man nik'ax ta chinuvech achique rubaniquil ri k'axo'n. . .ri nibanon chi ruqui'uel jun vinek nel pe chupan ri ruch'acul, achi'el vi ta nitz'okpin. Ri k'axo'n ri' janíla c'ayef y janíla nim- . . . .” *Manjun achin alaxinek pe chupan re c'aslen re' ri nitiquir ta nucoch' ri ralal ri rejka'n ri c'o chirij ri Ruc'ajol ri Dios tok rija' xeruq'uen pa ruvi' ri numac yin y ri amac rat, y xuben chi c'o jun rubeyal richin xkojcolotej el chupan ri kamac.”*

Tok nitzolin pe kac'u'x, c'o bey nic'atzin janíla kuchuk'a'. Riq'uin juba' janíla yojok' y yalan nic'atzin chi yojch'o ak'anij riq'uin ri Dios y nikatij kak'ij richin yekatakej ri rupixa'.

¿Achique nibec'ulun chavech ri tzij tzolibel c'u'x?

### ¿ACHIQUE MODO NITZOLIN PE KAC'U'X?

Ri Presidente Spencer W. Kimball xubij chi “*manek jun jebelilej bey ri napon pa tzolibel c'u'x.*” Manek jun bey ri



man ta c'ayef ri napon pa cuyubel mac. Chiquijujunal ri vinek c'o chi yebiyin chupan ri kitzij rubeyal ri tzolibel c'u'x. Xa manek rubanon vi jun vinek meba' o beyon, novinek o nacanic, nim raken o xa co'ol oc raken, o vi rija' jun k'atoy tzij o xa jun xabachique vinek. Can xaxe vi jun bey c'o. Ri bey ri' can nim raken y c'o ri q'uix, y ri ch'ay, y ri abej, y ri c'ayeval chupan" (*El Milagro Del Perdón*, p. 147).

#### NIC'ATZIN CHI NIKANA' RI KAMAC

Vi nikarayij nitzolin pe kac'u'x, nabey c'o chi nikana' ri kamac. C'o c'a chi nikanojij pa kánima chi kabanon jun mac. Vi man nikana' ta ri kamac pa kánima, manek modo chi nitzolin pe kac'u'x chupan ri kamac.

Ri Alma xupixabaj ri ruc'ajol rubini'an Corianton. Ri Corianton man utz ta xuben chire ri rusamaj tok xuch'abalij ri ruch'abel ri Dios. Y rija' xuben jun nimalej mac. Quere' c'a xubij ri Alma chire: "Yin ninvajo' . . .chi ri amac niquinek ri anojibal riq'uin ri nakonbel ri xtuben chi cha'nin nitzolin pe ri ac'u'x. . . .Man c'a tatij ak'ij richin nacuy avi' . . ." (Alma 42:29-30). Ri lok'olej tak tz'ibanic chuka' niqubij chike chi man ruc'amon ta chi nikabij utz chire ri itzel ri nikaben (tatz'eta' c'a ri Lucas 16:15-16).

Tok niketamaj ri utz chuveh ri man utz ta, nic'atzin chi nikanic'oj ri kac'aslen y nikak'alajirisaj ri man utz ta ri nikaben.

#### NIC'ATZIN CHI NIKANA' K'AXO'N COMA RI KAMAC

Nic'atzin chi man xaxe ta nikana' ri kamac, xa chuka' chi nikana' k'axo'n pa kánima roma ri kabanon. Nic'atzin chi nikanojij chi ri kamac xa itzel y tz'il. Nic'atzin chi nikarayij nikaya' can ri kamac y nikamaliy jumul. Quere' c'a niqubij ri lok'olej tak tz'ibanic: Xquec'ulutej c'a pe chupan ri ruk'ataj, riq'uin ri kasanic chuxe' ya', checonojel ri niqich'utinirisaj qui' chuveh ri Dios y niquirayij yekasex chuxe' ya' y yejel c'a pe tok paxinek chic ri cánima y ch'u-ch'uj ri cuxlabal y niqijiquiba' chiquivech ri k'ataj chi can xtzolin vi pe quic'u'x chupan ronojel ri quimac. (DyC 20:37).

## NIC'ATZIN CHI NIKAMALIJ CAN RI KAMAC

Tok janíla nik'axon kac'u'x, xtikarayij xtikaya' can ri kamac. Manek rubanon vi nikak'alajirisaj ri kamac y xa man nikaya' ta can. Vi can nitzolin pe kac'u'x chupan ri kamac, man xtikaben ta chic ri mac ri'. Vi jun vinek xelek', man xtelek' ta chic. Vi jun vinek xutz'uc tzij, man xtutz'uc ta tzij. Vi jun vinek xixokin can, xa man xtuben ta chic ri itzel mac ri'. Quere' xubij ri Ajaf chire ri José Smith: Riq'uin c'are' xtanabej vi jun vinek tzolijinek pe ruc'u'x chupan ri rumac—rija' xtuk'alajirisaj ri rumac y xtuya' can (DyC 58:43).

## NIC'ATZIN CHI NIKAK'ALAJIRISAJ RI KAMAC

Janíla nic'atzin chi nikak'alajirisaj ri kamac. Ri Ajaf rubin can chike chi tikak'alajirisaj ri kamac. Tok nikak'alajirisaj ri kamac, jari' tok yojch'uch'u can chire ri ejka'n richin ri kamac. Manek modo richin nikevaj chuvech ri Ajaf ri achique nikaben chupan ri kac'aslen. Nic'atzin chi nikak'alajirisaj ronojel kamac chuvech ri Ajaf. C'o chuka' ch'aka' chic mac ri c'o chi nikak'alajirisaj chuvech ri uc'uayon kabey chupan ri K'ataj. Vi yojixokin, o vi yojelek', o vi c'o jun chic ruvech kamac ri yalan nim, nic'atzin chi nikak'alajirisaj ri mac ri' chuvech ri uc'uayon kabey. Vi yojmacun chirij jun chic vinek, nic'atzin chi nikak'alajirisaj ri kamac chuvech ri vinek ri' chuka'. C'o ch'aka' chic mac chuka' ri man can ta e nima'k. Ri mac ri' utz nikak'alajirisaj xaxe chire ri Ajaf. Quere' xubij can ri Ajaf: Yin, ri Ajaf, nincuy ri mac, y ninjoyovaj quivech ri vinaki' ri niquik'alajirisaj ri quimac riq'uin ch'uch'uj cánima (DyC 61:2).

## NIC'ATZIN CHI NIKATZOLIJ RI ACHIQUE XSACH

Vi nitzolin pe kac'u'x chupan ri kamac, nic'atzin chi nikat-zolij ri achique xsach roma ri kamac. Jari' nibec'ulun chikavech chi nikachojmirisaj ronojel achique ri itzel kabanon. Vi jun vinek c'o xrelek'aj, nic'atzin chi nutzolij ri xrelek'aj. Vi jun vinek xutz'uc tzij, nic'atzin chi rija' nuk'alajirisaj ri kitzij. Vi jun vinek xuyok' jun chic vinek o vi xutze'ej ruvech, nic'atzin c'a chi re vinek re' nuk'alajirisaj chi ri xubij chirij jun chic vinek man kitzij ta. Vi quere' nikaben, ri kamac man xtoka' ta chuc'u'x ri Ajaf tok rija' xtuk'et tzij pa kavi' (tatz'eta' c'a ri Ezequiel 33:15-16).

## NIC'ATZIN CHI NIKACUY RI QUIMAC RI CH'AKA' CHIC VINAKI'

Vi nitzolin pe kac'u'x chupan ri kamac, yalan nic'atzin chi roj nikacuy quimac ri ch'aka' chic vinaki'. Ri Ajaf man xkojrucuy ta vi man ch'ajch'oj ta ri kánima. Vi yeketzelay ri ch'aka' chic vinaki', o vi yojxoch'in, man xkojcuyutej ta (tatz'eta' c'a ri 3 Nefi 13:14-15). Ri Ajaf rubin can quere': Roma c'ari' ninbij chive chi nic'atzin chi ticuyula' ivi' chivech. Y ri man xtuc'uy ta ri rach'alal, rija' xtetzelex chivech ri Ajaf. Roma ri rumac rija' más nim chivech ri rumac ri rach'alal (DyC 64:9).

## NIC'ATZIN CHI YEKATAKEJ RI RUPIXA' RI DIOS

Man tz'aket ta ri katzolibel c'u'x, vi man yekatakej ta ri rupixa' ri Dios jantape' (tatz'eta' c'a ri DyC 1:32). Manek modo chi jun vinek nubij chi xtzolin yan pe ruc'u'x vi man nutojon ta ri lajuritakil, o vi man nutakej ta chi utzil ri uxlanibel k'ij, o vi man nutakej ta ri Ch'abel richin Etamabel. Vi jun vinek man yerunimaj ta, ni ta chuka' yeruto' ri yukenela' chupan ri K'ataj, rija' manjani titzolin pe ruc'u'x. Queri' c'a chuka' vi ri vinaki' ri' man nrajo' ta ri Ajaf, o man yerajo' ta ri ch'aka' chic vinek. Jun vinek ri man yerajo' ta ri ru familia y man numol ta ri' quiq'uin richin nich'o riq'uin ri Ajaf, rija' manjani titzolin pe ruc'u'x. Tok jun vinek nitzolin pe ruc'u'x chupan ri rumac, rija' can nijalatej vi ri ruc'aslen rija'. Ri Presidente Kimball xubij quere': "Vi rat nitzolin pe ac'u'x, man xaxe ta xtaxibij avi' chivech ri mac, xa can xtak'alajirisaj, y xtaya' can, y xtzatlij ronojel ri yatiquir chique ri vinaki' ri e socotajinek roma ri abanobal. C'a c'ari', chijun ri ac'aslen xtatij ak'ij richin ye'atakej ri rupixa' ri Ajaf, richin queri' rija' xcarucuy c'a apon, y xcaruch'ajch'ojirisaj" (*El Milagro del Perdón*, p. 200).

Catzijon c'a juba' chirij ri rubeyal ri tzolibel c'u'x.

## RI TZOLIBEL C'U'X YOJRUTO'

Ri tojbalil mac ri xuben ri Jesucristo yojruto' pa kac'aslen vi nitzolin pe kac'u'x. Riq'uin c'ari', yecuyutej ri kamac. Chuka' yojosk'opix el chupan ri ximibel richin ri kamac y yojquicot.

Ri Alma xubij ri xuna' ri ránima tok xtzolin pe ruc'u'x chupan ri rumac:

Can janíla vi xt'ujt'ut ri vánima y xsocotej coma ri numac.

Ja', ronojel numac xe'okaka chinuc'u'x y chuka' ronojel ri itzel ri xinben. Y romari' xc'ajisex nuvech riq'uin ri k'axo'n richin ri xibalbay. Ja', xk'ax chinuvech chi yin xinpaba' vi' chuvech ri Dios, y man xentakej ta ri lok'olej rupixa'.

Janíla nim ri etzelal xinben. Y romari', tok xinnojij chi c'o chi xquinapon riq'uin ri Dios, xsocotej ri vánima riq'uin jun nimalej xibinri'il ri man yitiquir ta nintzijo.

Xc'ulvachitej c'a chi yin yitajin chutijic janíla pokonal roma xe'okaka chinuc'u'x ronojel ri numac. Tatzu' na pe, jari' tok xoka' chinuc'u'x ri lok'olej rutzijol ri xubij can ri nata'. Rija' xuya' lok'olej rutzijol chirij ri rupetebal jun achin rubi-ni'an Jesucristo, jun Ruc'ajol ri Dios. Rija' c'o chi xtipe na chutojic ri quimac ri vinaki' ri e c'o chuvach'ulef.

Yitajin c'a chuch'obic rij re tzij re', tok xinc'utuj pa vánima riq'uin ok'ej, quere' xinbij: Vajaf, Jesús, at Ruc'ajol ri Dios, tajoyovaj c'a nuvech.

Y tatzu' na pe, tok xinch'ob, manek chic xe'okaka chinuc'u'x ri nuk'axomal.

Y can janíla vi nuquicoten. Y janíla nim ri sakil ri xintz'et. Ja', ri vánima xnoj riq'uin quicoten. ¡Ri quicoten ri' janíla nim achi'el ri k'axo'n xinc'ovisaj can!

Manjun ri yalan jebel y yalan qui' chuvech ri nuquicoten." (Alma 36:12-21).

Tasiq'uij c'a ruvech ri Alma 36:10-28. Catzijon chirij ri pokonal ri xutij ri Alma tok xe'okaka chuc'u'x ri rumac. Catzijon chuka' chirij ri rubeyal ri rutzolibel c'u'x y ri rucuyubel mac.

## **¿JAMPE' UTZ NITZOLIN PE KAC'U'X CHUPAN RI KAMAC?**

Ri profeta'i' quere' quibin can: "Re c'aslen re', jare' ri ruk'ijul richin chi ri vinaki' niquichojmirisaj apon qui' richin niquitz'et ri Dios" (Alma 34:32). Nic'atzin c'a chi nitzolin pe kac'u'x vacami y ronojel k'ij. Tok yoyacatej nimak'a' nic'atzin chi nikanic'oj ki' richin nikatz'et vi ri Ruxlabal ri Dios c'o kiq'uin. Tok c'a manjani kojver ka chak'a', utz nikach'ob rij ri achique kabanon chupan ri k'ij ri' y nika-c'utuj chire ri Ajaf chi tuk'alajirisaj chikavech ri achique ri man utz ta xkaben. C'ari', c'o modo richin chi nitzolin pe kac'u'x chupan ri banobel ri'. Vi roj nitzolin pe kac'u'x

ronojel k'ij, y nikac'utuj chire ri Ajaf chi tucuyu' kamac. Xtic'oje' ri kac'aslen k'ij k'ij y xtikachojmirisaj ki'. C'a c'ari', ri kaquicoten xtuben janíla nim y janíla jebel achi'el ri ruquicoten ri Alma.

Tabij c'a chi janíla c'ayef richin niketamaj utz jun samaj chupan xaxe jun oc k'ij. Tabij chuka' chi man can ta c'ayef vi nikatij kak'ij ronojel k'ij chiretamaxic ri samaj ri'. ¿La junan cami ri' riq'uin ri tzolibel c'u'x chupan ri kamac?

CH'AKA' CHIC MOCAJ RI UTZ YE'ANIC'OJ

Mateo 9:10-13 y Lucas 13:3 y Ezequiel 18:30 (nitzolin pe kac'u'x o xkojcom)

2 Corintios 7:9-10 (ri kitzij bis)

Mosia 4:10-12 (ri rubeyal ri tzolibel c'u'x)

Isafas 1:18 y Mosia 26:28-32 (vi xtitzolin pe kac'u'x, xkojcuyutej)

DyC 58:42 (xquemestex c'a ri mac)

2 Nefi 9:23 (ri tzolibel c'u'x nic'atzin chire ri colotajic)

2 Nefi 2:21 (tizolin pe kac'u'x tok oj c'o vave' chuvach'ulef)